

四庫全書

集部

欽定四庫全書

遺山集卷三十八

金 元好問 撰

銘

孔道輔擊虵笏銘

龍圖孔公原魯擊虵笏闕里傳寶舊矣汴梁既下入宣撫王公家公之子以傳彥遠張君彥遠屬某作銘敢以蕪辭贅於徂徠石先生之末以俟後之君子已酉十月日書

大橫庚庚色棗漆殷血一線著恠迹殷士膚敏世載
德天以原魯配秀實文楷指佞堯屈軼屈之版
持氣不屈衣冠堂堂立如植寸鐵指月月不蝕妖
虵區區辱吾擊正以痛快與泚一徂徠之銘董孤筆
神物當為吾道惜屬君金匱秘石室一日龍化雷破
壁

良佐鏡銘

鄆城張氏蓄古鏡以百數其一識云見日之光天下大

明子用是知古人雖作細小物而閎衍博大之義寓焉
丙戌夏四月子過汜南良佐請銘其鏡因取往所見八
言之義行之以為銘良佐忠於愛君篤於事長嚴於治
軍旅又謙謙折節下士從諸公授論語春秋讀新安朱
氏小學以為治心之要故就其可致者而勉之

繁峙之金金城之功刻畫之制鍛鍊之功自其細者而
觀之不過為櫛縫巾帨几杖盤盂間之一物自其大者
而言之則乃有日月大明天地之至公且夫昭曠粹精

自天降衷惟不能取諸身而取諸物此偏暗之所以揜其聰須眉之不燭妍媸之不別與亡鏡同善惡之不明白黑之不分與亡視同豈有衣冠堂堂百夫之雄挾昭曠粹精之固有而不得比一物中悅盤盂之中古有之見爾前慮爾後吾願君子之擴而充

默庵銘為劉司正光甫作

時然後言真默者存理然後默至言之實子欲無言惟聖人能餘皆數窮以默自懲有喙三尺而學啞啞規以

自藏物不我假智如挈鉞靜如持城其中鏗鉉萬物震
驚酒見於面病見於脉眼有否臧口無青白欲息子言
當息子機一庵虛白天地同歸

布衾銘

百世溫公布衾終身服公之服嗟予何人人以貧為辱
我以貧為福人以儉為詐我以儉為德惟福惟德服之
無數

無絃琴銘

厥初制琴意寓於器器如可忘聖則徒制如陶所言奚
貴於琴羊存禮存大中之心我琴無絃絃會當具尚因
正聲以識真趣

最樂堂銘

工部高平趙公德宇冲粹與物無競揚歷中外餘三十
年朝廷自公宰士皆以為君子長者晚節末路浮湛里
社乃無失侯故將幽憂憔悴之態詩所謂風雨如晦鷄
鳴不已者於公見之新居有堂取古人為善自得之義

名之曰最樂以公平生攷之可謂無媿其名矣新興元
某為作銘

樂外有終樂內莫窮惟樂焉有外內之別斯君子小人
之不同大本在中至和與融涵浸薰醲四體以充孰不
秉燹而天獨以厚公醪醴腐腸鼓鐘闕聰誠有器器者
存洵憂畏其誰攻相彼力田祗繫於逢就七遇之皆北
要萬折而必東遼海管寧鹿門龐翁幽蘭深林穆如清
風雖心逸日休人知作德之所自至於身康彊而子孫

吉者將非為善之功乎

超然堂銘

眼空四海自聖癡舌唾一時無眼禪匡床兀坐差獨賢
思澤小侯佳少年威儀秩秩賓初筵榮觀燕處防未然
小學之書聖所傳祝君持心靜而天青雲驂韶翩翩
仲寧提領年甫弱冠顯襲世爵蓋嘗從吾友輔之教
授張君學故時譽甚著日者燕諸老於所居之超然
堂問以超然之義且以銘為請因就其所可致者而

勉之

太古堂銘

廣寧全道太古真人寧海郝君初入道習所謂以苦為樂者塊坐趙州南石梁之下六年羽化之後高第范鍊師復來趙州築環堵而居之官吏士民請住州之天寧觀後十年真定幕府叅議趙振玉起堂於天寧名之曰太古左司郎中賈道成因立真人像於中使其徒事之真人平生篤於大易之學其以古道自期者蓋天性然

余嘗讀太古集見其論超詣非今日披裘擁絮囚首喪面者之所可萬一癸卯冬過慶源館鍊師所居乃為作太古堂銘其銘曰

宇宙一途萬物並馳至人深心砥柱不移一念萬年後天為期虛室生白嗒焉自遺故曰存乎人不繫其時居今而行古豈季末之能滴玄學希夷大易精微致身羲皇野鹿標枝穴居野處旦暮見之彼素隱行恠小智自私泯泯默默至老死而不自復者殆昨暮兒耶

皇極道院銘

虛白處士趙君已入全真道而能以服膺儒教為
業發源語孟漸於伊洛之學方且探三聖書而問
津焉計其真積之力雖占候醫卜精詣絕出猶為
餘及耳道風既扇旌車時徵曳裾王門大蒙寵遇
三年以母老得請歸在鎮陽行臺奉被恩旨發泉
公帑築館迎祥觀之故基是為皇極道院年月日
某實叙而銘之處士名素字才卿河中人虛白其

賜號云

聖學心傳惟精惟一作新斯民下土是式相爾東爨有
物有則厥惟背馳固有而失有淫有朋有比其德匪伊
司南張其槩埴于帝其訓王道正直福自爾求如斂而
錫咨爾虛白慮然後得言以道敷中由權執賢王好善
而康而色相協厥居方穀之實善頌善禱香火晨夕恭
惟君師永建皇極

長真庵銘

淮安張澤之為子言福昌之東韓城長真譚公舊隱之
跡在焉其徒王志明者葺居之土木之功略具矣用譚
公之故名之曰長真庵志明初隸唐州營卒在諸黥中
獨以性行見稱其主獄囚有矜憫之實飢飽寒暑每為
調護之既久轉將領貲產亦厚一旦與道人語慨然有
高舉遠引之意即棄家入道其子追及于襄城泣拜請
還志明確然不移遂入崧山師事紫虛于大師及即僊
翁積年避壬辰之兵東之海濱亂定還洛陽築環堵于

韓城而居之道俗歸向以為堅坐六年非世人所能堪
乃即譚所居而奉之今年過八十神觀殊未衰目光炯
然人望之知為有所養者長真為得人矣幸吾子為之
銘澤之予舊交其言可信不妄乃參用溪南詩老辛敬
之之語為作銘銘曰

其兼愛也楊其苦節也墨有許行之樹藝有頭陀之縛
律其澹然無營又似夫修混沌氏之術者也若夫腐朽
之可神糟粕之可醇即色而實相即空而法身孰妄而

孰真吾知有存乎其人而已

天硯銘

楊子得片石於馬山之前方廣一尺厚減寸之半從長
衡短狀若展掌底平而不頗坎可以貯水而面可以受
墨杜仲梁曰此天硯也煥然乃請余為之銘

義則方智則圓動也人靜也天在物強名在我自然爾
目惟鸚鵡味惟鳳簫火緹縵求中產之售漆室緹衣致
賓筵之奉彼金樅而石奏泉生而雲滃者亦惟硯之用

割烹是謂食費瑑刻不加玉重吾知一日而沒百畦惡
於漢陰之抱甕

小紫玉池硯銘

蒼龍太一玉版之次維寶硯三并此而四出中秋歸元
氏得非所宜殆天賜子孫保之他日知野史之所自

贊

手植檜聖像贊

乙巳冬十二月拜林廟還得手植檜把握許就刻之為

宣聖顏孟十哲像且以文措為龕像出于手繪為難
其得於煨燼之餘又為難合是二難宜為儒家世寶廼
百拜而為之贊云

體則微理則全望之儼然即之溫然見其參於前手所
植焉形所寓焉歛之管窺浩浩其天是將以為甘棠之
賢耶抑與夏鼎殷盤而傳也

老人星贊

惟南有星與弧直其名老人天一極或見或隱代不一

光精何年貫此石非丹非青非琢刻玄龜導前竄後翼
飄然而來莫從詰祝翁少留觀世德尚為斯民開壽域
宣政間忻州天慶觀道士能知推命其宗人堅畫老
人星像紫府竹璟為之贊石刻有二一在吾州一在
濟源貞祐甲戌之兵天慶廢石刻之存亡未可必在
濟源者畫像雖存而贊文漫滅不可讀己亥正月子
見之濟瀆祠歎州里舊物免時所常見者將遂湮滅
而不傳因為贊以補之且使三人者姓名復見於此

紫府今五臺二十七日謹記

范文正公真贊

文正范公在布衣為名士在州縣為能吏在邊境為名將
在朝廷則又孔子之所謂大臣者求之千百年之間蓋
不一二見非但為一代宗臣而已丁酉四月獲拜公
像於其七世孫道士圖曦乃為之贊云

以將則視管樂為不忝以相則方韓富為有餘其忠可
以支傾朝而寄末命其量可以際圓蓋而蟠方輿朱衣

玄冠珮玉舒徐見于丹青英風凜如古之所謂垂紳正
笏不動聲氣而措天下於泰山之安者其表固如是歟

趙閑閑真贊二首

周旋於正廣道宗平叔之間而獨能紹聖學之絕業歛
避於蔡無可党竹溪之後而竟推為斯文之主盟不立
崖岸之謂和不置町畦之謂誠不變燥濕之謂定不汙
泥滓之謂清藹然粹溫見于丹青雖無老成人尚有典
刑鳳衰無周龍移啓魏殄瘁攸屬古為悲歎人知為五

朝之老臣不知其為中國百年之元氣

興定初某始以詩文見故禮部閑閑公公若以為可教
為延譽諸公閒又五年乃得以科第出公之門公又謂
當有所成就也力為挽之獎借過稱旁有不平者宰相
師仲安班列中倡言謂公與楊禮部之美雷御史希顏
李內翰欽叔為元氏黨人公不之卹也正大甲申諸公
貢某詞科公為監試官以例不赴院宿一日坐禮曹欽
叔從外至誦某秦王破竇建德降王世充露布公頗為

聳動顧座客陳司諫正叔言人言我黨元子誠黨之耶
公之篤于自信蓋如此壬辰冬某以東曹掾知雜權都
司取行止卷觀之見公獨銜及楊雷猥相薦引者十七
章竊自念言公起布衣仕五朝官六卿自奉養如寒士
不知富貴為何物其自待如此顧雖愛我寧欲為利祿
計欲使之亟進得以斗升活妻子耶惟是愚陋不足以
當大賢特達之遇兀兀近五十而迄無所成用是為媿
負耳北渡後求汴人趙濟甫為公寫真因題贊其上嗚

呼公道德文章師表一世如我乃得而事之公初不以利祿期我然則今所以事公者雖出于門弟子之私亦豈獨以門弟子之私也哉

公無恙時辱公陶甄携之提之且挽且前萬馬之所馳不足以北公之轅萬折之所礙不足以迴公之川將私其私耶抑以為文字之傳匠石斲斤子牙絕絃千載一人猶以旦暮萬里一士且謂比肩念公生平使我涕漣顏如渥丹雙瞳炯焉彼粹而溫既與不可傳者死矣觀

乎此則猶可以髣髴其足音之跼然

范鍊師真贊

戊戌之夏子過東平留宿正一宮時范鍊師已東邁門
弟子王仲微出其寫真求子為贊鍊師初事崑崙郝公
號之曰玄同子後從棲霞丘公復有玄通之目故兼及
之贊曰

異欲其同介欲其通惟天與之形而道與之貌者不可
變故無地以受運斤之風三山微茫貝闕珠宮野服蕭

然與雲俱東橫絕四海者亦何慕冥冥之鴻耶

寫真自贊

崧山 中作

短小精悍大有孟浪勃率盤跚稍自振厲豪爽不足以
為德秀之兄蕭散不足以為元卿之弟至於欽叔之雅
重希顏之高氣京甫之蘊藉仲澤之明銳人豈不自知
蓋天稟有限不可以強而至若夫立心於毀譽失真之
後而無所恤橫身於利害相磨之場而莫之避以此而
擬諸君亦庶幾有措足之地

介山馬卿雲漢為仲晦甫寫真燕坐蕭然六籍
在旁目曰讀經圖欣然有會於予心者為作
贊云

聖謨洋洋善誨循循敝則新兮司南通涂及門而堂自
致身兮致身維何山立揚休叶經綸兮所學所知效之
所天遂及民兮河潤九里海潤百里煦如春兮大方無
隅孰墨孰儒孰緇磷兮緇衣好賢佩之飛霞冠青雲兮
方內之外方外之內有若人兮

張幾道鍊師真贊

玄學為家平實中和靜焉而不譁孫龍田巴其書五車
吾知為盜夸若夫自後而先絕素隱之累方外而內無
多岐之差語有之人之生也直然則若人之所以敦龐
耆艾者其未涯也哉

頌

登封令薛侯去思頌

興定二年冬十月二日詔以王屋令薛侯莅登封侯之

來前政適為飛語所被羣小熖熖如焚絲如沸糜殆若不復能措手者侯曰內之不治不可以言外於是退悍卒併冗吏決留務釋滯獄不旬日縣中廓廓無事即召里胥鄉三老之屬凡民之貧富丁之衆寡里社之小大輸送之近遠諦問詳審纖悉具備著為成籍按其次而用之貸逋賦以寬流亡假閒田以業單貧一粟之歛一夫之役均配周及權衡之必平錙銖之必分也寬以期日不復強責計以追胥之費之半而公上給矣方春勸


耕遭田父野叟於途慰以農里之言而勉之孝弟之訓
懇切至到人為感動以為前乎此蓋未嘗有令惠吾屬
之如此也大槩侯之治仁心以為質不屑屑於法禁人
有犯薄示之辱教以改過而已至於老姦宿惡不可以
情用者深治而痛繩之終不以為夸也故吏畏而愛民
愛而畏上官不敢撓以事實客不敢干以私教化興行
頌聲流聞四外之人莫不以崧前為樂土焉明年邑之
民有借寇之舉會官以辟舉令法有不便者一切罷之

民即相與言曰吾侯如是而不得終惠茲邑侯往矣吾屬能久於此乎雖然侯之政不可以無述也於是刻石頌德以致其去思之心焉侯名居中字鼎臣泰和中進士乙科釋褐淦陽簿即有聲其辭曰

吏姦而漁吏酷而屠軒裳賄階章綬盜符魚肉視人以膏自濡百騰踵來惠而不鉏饒喙既饜督之公輸嗟嗟遺黎寒餓而飮歛孳幾何日腊以枯孰當膏之俾還敷腴侃侃薛侯仁信篤誠優為趙張耻以自名我靖我民

而不震驚涵浸薰醲千室更生侯勸于郊民爾良苦治
爾耒耜安爾田畝輕家而逋孰為汝所不奪汝時不急
汝租無惰不勤游末是趨辨爾種莠相爾菑畲區爾欲
深苗爾欲疏稂莠既芟蟲賊既除穰穰滿家貢以羨餘
民拜侯教我敬我事迨其有秋維侯之賜有來督郵責
賦失期侯惠我民吏不叩扉丁男有言趣輸無遲及此
暇時從侯于嬉有嘉者禾將獻而失民謂我侯豈當移
秩蕭蕭馬鳴我侯于征侯無愠容民有嘆聲吏昔屏氣

今當誰畏盜昔知義今當誰媿予渴未濡蔽其泉流予
暵未蘇徹其庇庥侯去不留云如何憂中天之雲是陰
下邑出而為雨崇朝萬國我思我侯與雲偕來引領南
東顧瞻裴回嵩丘盤盤潁水涓涓我侯之思其有既哉



遺山集卷三十八

欽定四庫全書

集部

遺山集卷三十九
四十

詳校官中書臣沈颺

主事臣呂雲棟覆勘

總校官編修臣倉聖脉

校對官編修臣沈清藻

謄錄監生臣李世麟

欽定四庫全書

遺山集卷三十九

金 元好問 撰

書

癸巳歲寄中書耶律公書

四月二十有二日門下士太原元某謹齋沐獻書中書
相公閣下易有之天造草昧君子以經綸伏惟閣下輔
佐王室奄有四方當天造草昧之時極君子經綸之道
凡所以經造功業考定制度者本末次第宜有成策非

門下賤士所敢與聞獨有一事系斯文為甚重故不得不為閣下言之自漢唐以來言良相者在漢則有蕭曹丙魏在唐則有房杜姚宋數公者固有致太平之功而當時百執事之人毗助贊益者亦不為不多傳記具在蓋可考也夫天下大器非一人之力可舉而國家所以成就人材者亦非一日之事也從古以來士之有立於世必藉學校教育父兄淵源師友之講習三者備而後可喻如修明堂總章必得榘楠豫章節目礪砢萬牛挽

致之材預為儲畜數十年之間乃能備一旦之用非若
起尋丈之屋構櫨椳楔楹棧薨桷雜出於榆柳槐栢可
以朝求而暮足也竊見南中大夫士歸河朔者在所有
之聖者之後如衍聖孔公耆舊如馮內翰叔獻梁都運
斗南高戶部唐卿王延州從之時輩如平陽王狀元綱
東明王狀元鶚濱人王賁臨淄人李浩秦人張徽楊煥
然李庭訓河中李獻卿武安樂夔固安李天翼沛縣劉
汝翼齊人謝良弼鄭人呂大鵬山西魏璠澤人李恒簡

李禹翼燕人張聖俞太原張緯李謙冀致君張耀卿高
鳴孟津李蔚真定李治相人胡德珪易州敬鉉雲中李
微中山楊果東平李彥西華徐世隆濟陽張輔之燕人
曹居一王鑄渾源劉祁及其弟郁李全平定賈庭揚楊
恕濟南杜仁傑洛水張仲經虞鄉麻革東明商挺漁陽
趙著平陽趙維道汝南楊鴻河中張肅河朔勾龍瀛東
勝程思溫及其從弟思忠凡此諸人雖其學業操行參
差不齊要之皆天民之秀有用於世者也百年以來教

育講習非不至而其所成就者無幾喪亂以來三四十人而止矣夫生之難成之又難乃今不死於兵不死於寒餓造物者挈而授之維新之朝其亦有意乎無意乎誠以閣下之力使脫指使之辱息奔走之役聚養之分處之學館之奉不必盡具饘粥足以糊口布絮足以蔽體無甚大費然施之諸家固以骨而肉之矣他日閣下求百執事之人隨左右而取之衣冠禮樂紀綱文章盡在於於是將不能少助閣下蕭曹丙魏房杜姚宋之功乎

假而不為世用此諸人者可以立言可以立節不能泯泯默默以與草木同腐其所以報閣下終始生成之賜者宜如何哉閣下主盟吾道且樂得賢才而教育之一言之利一引手之勞宜不為諸生惜也冒瀆台嚴不勝惶恐之至某再拜

與樞判白兄書

某頓首自己巳歲往河南舉先夫人旅殯首尾閱十月之久幾落賊手者屢矣狼狽北來復以葬事往東平連

三年不寧居坐是不得奉起居之間吾兄亦便一字不相及何也如聞曾定襄人處寄書然至今不曾見但近得仲庸書報鐵山已娶婦吾兄飲啖如平時差用為慰耳去秋七月二十三日忽得足痿證賴醫者急掇之僅免偏廢今臂痛全減但左右指麻木仍在也比來數處傳某下世已有作祭文挽辭者此雖出於妬者之口亦恐是殘喘無幾神先告之耳向前八月大葬之後惟有實錄一件只消親去順天府一遭破三數月功抄節每

朝終始及大政事大善惡係廢興存亡者為一書大安
及正大事則略補之此書成雖溘死道邊無恨矣更看
向去時事稍得放鬆否也王先生碑今送去中間有過
當處吾兄細為商略之碑石想亦未便立得他日改定
亦無害也所欲言者甚多聊疏三二事欲吾兄知之有
便望一書為報也時暑自愛不宣

荅中書令成仲書

張子敬處備悉盛意未幾張伯寧來招致殷重甚非衰

謬之所堪任其還也不得不以書通癸卯之冬蓋嘗從
來使一到燕中承命作先相公碑初不敢少有所望又
不敢假借聲勢悠悠者若謂鳳池被奪百謗百罵嬉笑
姍侮上累祖禰下辱子孫與渠輩無血讎無骨恨而乃
樹立黨與撰造事端欲使之即日灰滅固知有神理在
然亦何苦以不貲之軀蹈覆車之轍而試不測之淵乎
君侯材量閎博藹有時望士大夫出於門下者有何限
量朝夕接納足以廣見聞益智慮而就事業顧僕何人

敢當特達之遇乎復有來命斷不敢往孤奉恩禮死罪
死罪某再拜

荅聰上人書

某頓首啟四月末自太原來鎮州得春後手書副以寶
刀新什反復熟讀且喜且嘆又媿哀謬無以稱副好賢
樂善之心耳僕自貞祐甲戌南渡河時犬馬之齒二十
有五遂登揚趙之門所與交如辛敬之雷希顏王仲澤
李欽叔麻知幾諸人其材量文雅皆天下之選僕自以

起寒鄉小邑未嘗接先生長者餘論內省缺然故痛自
鞭策以攀逸駕後學時文五七年之後頗有所省進而
學古詩一言半辭傳在人口遂以為專門之業今四十
年矣見之之多積之之久揮毫落筆自鑄偉詞以驚動
海內則未能至于量體裁審音節權利病證真贋攷古
今詩人之變有慙直而無姑息雖古人復生未敢多讓
常記平生知己如辛敬之李欽叔李長源輩數人每示
之一篇便能得人致力處自諸賢彫喪將謂無復真賞

乃今得方外三四友如上人者其自幸宜如何哉上人
天資高內學富其筆勢縱橫固已出時人畦畛之外唯
前輩諸公論議或未飽聞而饜道之耳古人有言不見
異人必得異書可為萬世學者指南可終身守之此僕
平生所得者敢以相告錦機已成第無人寫潔本年間
得斷手即當相付亦倚公等成此志耳人行遽書不盡
言時暑萬萬以道自護不宣

荅大用萬戶書二

某頓首啓東原宿留幾半歲之久辱公家賢弟昆慰藉
之厚內省哀謬媿無以當之耳即日伏惟起居萬福孫
德謙張夢符津送至魏京今東歸矣雷氏霜鐘亦名器
也胥門舊物果有所歸到日公自知之臨行聊此為候
向暄千萬自愛不悉某再拜啓

某頓首辱書知賢昆李雅意媿哀謬無以當之即日伏
惟侍奉萬福自西歸鹿泉值仲女病劇奔詣太原留百
許日僅得勿藥即欲東行繼聞相君北上且留待他日

諸餘張嬀能言之所需橫笛侍女圖今奉去樹萱堂記
相見下筆未晚歌器賦全文并跋語千萬錄寄欲入見
聞錄中時暑彊學為親加愛不一一某再拜

疏

忻州修學疏代郝侯作

始定終綏守文之期式邁有教無類作人之効可徵言

念吾州久崇廟學傳侯完復於天德小康之際

傳守名慎微字

機先要公增築于大定承平之時

要守名介字伯升

極地位之高

明副師儒之嚴重華表俯窺於雙鶴

廟學下有雙鶴觀

連岡雄

鎮於九龍

學在九龍岡最上

弦歌絕井邑之譁韋甫易弓刀之

舊孫內翰之科名相踵

孫名九鼎字國鎮國初狀元郡人

姚隱君之文

石具存

學記醉軒先生所作名孝錫字仲純徐州人

不圖劫火之餘遽有園

蔬之嘆顧慙小已猥守大藩方舉廢之是圖亦少文之

當變昔魯僖以泮宮發頌齊宣由稷下垂聲不能廣廈

以庇賢良媿萬夫之觀政況乃玄壇並峙佛屋載新開

檀施於奔馳戰歿之場化金碧於顧盼頻呻之頃何私

有百神之秩而公無二仲之祠既責任之有歸豈經營之敢後下車修庠序之教猶竊恨其遲扶杖思德化之成夫何遠之有孰相茲役我懷其人

清真道院營建疏

奉為本庵欲創聖位以為焚誦祝延之所其於工費有賴弘持謹投諸方上善共締清緣者竊以像設嚴真儀之奉齋廚維淨侶所安祝贊有歸功緣為大方經營之伊始宜助藉之相先凡我同仁幸垂一諾謹疏戊申六

月日遺山老人疏

請太一宮提點李大師住天封疏

太室兼衡霍之秀天封維僊聖所廬劒飛而古栢仍存
石潤而仙蒲未老孰為真隱再暢玄風揚潘馬之徽音
續覃劉之正脉李公大師源分渦水名動漢庭靜一得
精微之傳冲退為衰薄之鎮惟望拜之祠既舉而司真
之治方虛敢因黃鶴之書敬促青牛之駕壁門金闕瞻
星漢以非遙玄都石壇佇嵩呼之復振善哉行矣今正

是時

興國院改律為禪請住持疏二首

軌轍交馳塵勞先起皮毛盡落真實具存星河同是一
天淮濟更無別水談空說有何妨挨轉話頭指東畫西
究竟不離當處眷茲興國初議安禪誰堪選佛道場來
舉開山公案集公清風匝地滿月當秋不甘北覬之鈴
鎚自當壽寧之衣鉢

僧嗣壽寧月

光明既露難擬蓋藏賓王

相諳共為推挽雲山改色鐘鼓同聲暫從華表之游盡

革青羶之舊法筵龍象同歸佛祖之權大地山河永祝
南山之壽善哉行矣今正是時

福慧兼全萬為希有人境相值一變從新載惟父祖之
田園遠歷隋唐之歲月透龕仍在露塔相望雖齋鼓粥
魚粗供朝夕而樹林水鳥未極幽閑幸我賢侯特紆深
眷謂打地之清風未遠而開門之勝槩空孤變遷既異
於古今授受寧論於甲乙誰其作古自有當仁固知不
出當家終亦難逃公議月輪桂樹斬新別出一枝佛國

旃檀何暇更求他木某公清標孤峻道照虛明袖裏圈
繩穿透向上諸人鼻孔林間几席坐斷天下衲僧舌頭
既為大事因緣化身合與末法衆生援手自教自禪之
已竟誰賓誰主以何言勿云鶴戀舊巢自是龍行故道
高提正令行十三八倍之權永為皇家延百億萬年之
壽無勞擬議便可承當

曹子歸葬疏

松柏歲寒莫重死生之託金蘭天屬亦有急難之求久

要不忘交情乃見通甫曹君牧之風調張祐才名誰謂
雍容閑暇之平生而有零落棲遲之暮景風霜十月身
去國而不歸蓬蒿一丘事蓋棺而未了且行路有匍匐
之救豈徒哀無賄賂之文凡我同盟忍忘斯義城旁塚
地何如溫序之鄉閭汴上麥船會有范家之父子

雜體

麻杜張諸人詩評

麻信之杜仲梁張仲經正大中同隱內鄉山中以作詩

為業人謂東南之美盡在是矣予嘗竊評之仲梁詩如
偏將軍將突騎利在速戰屈於遲久故不大勝則大敗
仲經守有餘而攻戰不足故勝負略相當信之如六國
合從利在同盟而敝於不相統一有連鷄不俱棲之勢
雖人自為戰而號令無適從故勝負未可知光弼代子
儀軍舊營壘也舊旗幟也光弼一號令而精彩皆變第
恐三子者不為光弼耳

射說

晉侯觴客於柳溪命其子婿馳射婿佳少年也跨躡柳
行中勝氣軒然舞於顏間萬首聚觀若果能命中而又
搏取之者已而樂作一射而矢墮再而貫馬耳之左馬
負痛而軼人與弓矢俱墜左右奔救雖支體不廢而內
若有損焉晉侯不樂謝客客有自下座進者曰射技也
而有道焉不得於心而至焉者無有也何謂得之於心
馬也弓矢也身也的也四者相為一的雖風之微將若
車輪焉求為不中不可得也不得於心則不然身一馬

一弓矢一而的又為一身不暇騎騎不暇穀穀不暇的
以是求中於奔駛之下其不碎首折支也幸矣何中之
望哉走非有得於射也顧嘗學焉敢請外廐之下駟以
卒賢主人之歡何如晉侯不許顧謂所私曰一馬百金
一放足百里銜策在汝手吾安所追汝矣竟罷酒元子
聞之曰天下事可見矣為之者無所知知之者無以為
一以之敗一以之廢是可嘆也作射說

酒裏五言說

去古日已遠百偽無一真獨惟醉鄉地中有羲黃醇聖
教難為功乃見酒力神誰能釀滄海盡醉區中民此余
二十六七時詩也壬辰北渡順天毛正卿楊德秀與一
傅生祈仙山寺中蘇晉降筆寫詩數十首一詩有百偽
無一真中有羲黃醇之句餘詩除酒裏神仙我五言外
多不成語正卿德秀初不知蘇晉為何代人不論此詩
何人作也而晉所批乃有此十字晉豈余前身歟抑嘗
見余詩竊以為已有者歟將近時鬼物之不昧者記余

詩以託名於晉以自神也是皆不可知晉既以予詩為渠所作故余亦就酒裏神仙我五言取償於晉作樂府一篇繡佛長齋半生枉伴蒲團過酒壚橫卧一蹴虛空破頗笑張顛自謂無人和還知麼醉鄉天大少箇神仙我

靖德昭兒子高戶字說

古今俗忌以五月為惡月端午為惡日赴官者頗不敢發生子者棄不敢舉不幸而與禍會故一切以俗忌為

當然赴官後期蓋不足計生子而不之舉其禍可勝言哉原武靖德昭以此月舉兒子靖氏蓋靖郭君之裔乃取田文故事名之曰高戶而乞字於余余以為五月生子往往富貴而壽如漢大將軍王鳳相國胡廣晉王鎮惡之等其事見於史漢魏晉之書為甚詳秉筆者亦欲明已定之分祛雷同之惑故諄復言之德昭之先人南湖翁蚤歲以文武材傑出時輩浮湛里社四五十年之間抱利器而莫之試其所得者君子長者好賢樂善之

名耳德昭問學甚篤行義甚修遭離世故又抑不能舉
宜為造物者之所乘除以起家之子遺之也高戶今六
歲青衿繡襦溫然如含玉之璞琢而文之將為萬乘之
器吾知惡月之說殆田家媪火爐頭語耳因字之伯起
書以貽之

曹南商氏千秋錄

曹南商氏族姓所起見於遠孫正奉大夫贈昌武軍節
度使衡所著千秋錄備矣蓋自少旻而降得姓者十四

契始封商以子命氏十三世而至湯十七世而微子代
殷後為偃王又二十六世於秦於兩漢於曹魏六朝隋
唐詳見於家牒者以節度君推世次系出陳之長平長
平殷高宗家在馬遠祖司空侑唐史有傳太和中再領
天平節鉞子羽舉進士藩府辟召不至通顯子盈孫僖
宗聞其有禮學擢為太常博士終於大理卿贈吏部尚
書子暄暄之子處讓處讓之子嶽已上失其官號俱為
唐人嶽之子諱懷欽入五代十年生周顯德三年劉燦

勝擢第終於宋建隆四年朝奉郎試大理評事知趙州南華縣事致仕因家於曹享年九十四詳見譜牒蓋自司空而後為鄆人南華而後為曹人避宋宣祖諱改姓商氏逮節度君九世矣南華之子捷淳化三年孫何勝擢第累官至比部郎中生七子宗聖宗傳宗回宗弼宗旦宗奭宗昱宗傳宗弼宗旦三子登科宗傳咸平三年陳堯咨勝擢第初仕蜀川後乃隔絕不知所終宗弼大中祥符五年徐奭勝擢第累遷至中書舍人仁宗朝時

譽藹然有卿輔之望其後不樂仕進年未五十乃挂冠
築堂曹南之西園名曰晦道時賢高其勇退盛為稱道
之享年七十娶冀氏封金華縣君生八子倚備儼傳佑
佺佖偕倚備傳佺四子登科即節度君六世祖也宗旦
字繼周天聖五年王堯臣榜擢第官至朝奉郎知桂陽
監平陽令享年五十二娶卞氏生四子伊灝佾佺詳見
墓誌長子伊伊子諱倚元豐五年黃裳榜第一甲第三
人擢第初任太原教授大學博士後元祐黨事興碑其

名於餘官之列一子中立備皇祐三年馮京榜擢第三子穆之伯之適之傳字夢臣皇祐五年鄭獬榜擢第繼登說書科授國子直講終於光祿寺丞出知虢州耒陽縣事亦足以知當時重守令之選也享年六十一累贈太中大夫娶李氏封恭人詳見墓誌即節度君五世祖也生七子千之元之立之延之坦之成之貫之元之貫之登科侂嘉祐四年劉輝榜擢第終於通直郎致仕享年七十四娶張氏生五子先之才之孝之說之直之先

之說之登科元之熙寧九年徐鐸榜擢第終於丞議郎
濟州鉅野今縣界金山寺碑在焉娶蕭氏四子因圉冉
丙因登科先之元豐五年黃裳榜擢第終於衡州茶陵
令貫之字以道後改名又元祐六年馬洵榜擢第張君
向辟為計司屬官終於朝散郎知懷州武德鎮致仕享
年六十七娶張氏封安人即節度君之高祖也生六子
周同岡冊丹角皆業進士說之建炎五年李易榜擢第
授鄧州文學後攝濟陰主簿阜昌二年通判興仁軍府

事張君檄文商文學素勤學古可使入官今保舉堪赴吏部注擬差遣竟不就享年六十娶傅氏即龍圖公之女孫也四子黥黥黥黥後改名休復字子泰風儀秀整襟量夷曠博學有文老居汴梁娶江氏即金紫公鄰幾女孫也有陶丘先生文集行於世諱九舉終場建中靖國元年恩賜進士第終於虔州大庾令因紹聖四年何昌言榜擢第終於通仕郎開德府臨河縣令三子大有大聲大臨周宣和元年以父守朝散郎致仕奏補累

官至通直郎開德府濮陽縣丞一子驤岡字元壽建炎二年從劉錫太尉解危滄州奏補拱輔從事入金朝換忠勇校尉享年七十二即節度君之曾祖也初娶周氏再娶鄭氏二子駒馳冊字元功丹字大忠後改名愈字師心為施內翰朋望詩酒之交生二子驥驤皆早世角字子華俱以儒業顯于鄉里學者宗之祖駒字士龍兩赴庭試天資和雅博學強記教授鄉里泰和元年五月十五日以壽終享年七十一祖母郝氏封宜人三子長

永錫字難老次敷錫字福老次康錫字吉老難老用公
貴及封朝請大夫致仕妣王氏濮陽郡太夫人三子仲
曰衡字正叔滑稽豪俠有古人風季曰衍字信叔穎悟
早世公朝請君之長子也字平叔幼從祖學長師鄉先
生李若訥若訥愛其才每器重之年二十五擢崇慶二
年黃裳榜詞賦進士第釋褐主鄜州洛交簿以廉能換
郿縣尋辟威戎令時興定己卯歲饑民無所於糴公乃
開倉賑濟然後白之行臺賴以全活者甚衆夏六月地

震城野推圮夏人乘釁入寇公率領蕃部土豪守禦應敵保以無虞秩滿縣人為之立祠再辟原武令以例罷入為尚書省掾歷糧草邊關知管差除三房考再滿授戶部主事兩月擢拜監察御史姨母郕國夫人不時入禁中干預政事聲勢甚張公拜章極言自是郕國被召乃敢進見宗室帥慶山奴軍淮南歸州失利朝廷置而不問公建言自古敗軍之將必正典刑不爾則無以謝天下詔為決杖八十因而退罷戶部侍郎權尚書曹溫

時一女在掖庭從史親舊干預權利其家人填插諸司貪墨張露而臺官無敢言者公歷數其罪詔罷溫戶部改太后府衛尉公再上章若臣言溫果可罪當貶逐溫無罪則臣為妄言豈有是非不別而兩可之哀宗為之動容乃出溫為汝州防禦使未幾改右司都事朝廷知公蓋將大用矣改同知河平軍節度使事不赴奏充樞密院經歷官遙領同知昌武軍節度使事丞相完顏莘公領陝西行臺奏公偕行充左右司員外郎仍佩以金

符密院表留有旨行臺地重急於用人可從丞相奏自
是臺務一決於公矣明年召還行臺再奏留之又明年
丁內艱乃得還平章政事蕭國侯公塞京東河決奏公
以左右司郎中從行正大八年十月起服中充秦籃總
帥府經歷官正月河潼失守召主帥入援二月九日軍
至陝將由閒道之長水界與北軍遇相拒大雪中士卒
饑凍不能戰主帥烏登棄衆降敵公為北軍所得令去
中公瞋目大噉曰汝欲脅從我耶我終不能降廻望關

瞻拜曰主將無狀亡兵失利臣之罪責亦無所逃但一死報國耳遂拔佩刀自剄時年四十有六褒贈正奉大夫昌武軍節度使初娶鄧氏繼娶鄭氏並封濮陽郡夫人子男二人長曰挺字孟卿業進士次曰援字仲經女一人適進士劉茂孫男七人琥璘璫璿皆業進士瑋璵瑄及女孫二人尚幼初河間許古道真以直言極諫稱於德陵朝正大初詣闕拜章言八座皆非其材省寺小臣有可任宰相者不大升黜之則無以致中興章奏召

道真赴都堂問孰為可相道真以尚書省掾商衡對當
是時上新即大位經畧四方思所以弘濟艱難者為甚
力道真已得請居伊川即命驛召致之復右司諫天下
相望風采道真亦慷慨願以人所不敢言者為天子言
之及論天下事首以公為可相則公之材為可知矣公
事長上以禮接下以誠與人交敦終始家居怡然毋愠
容性嗜學藏書數千卷古今金石遺文人所不能致者
往往有之南渡以來士大夫以捄世之學自名高者濶

略而無所統紀下者或屑屑於米鹽簿書之間公天資雅重遇事不碌碌人所不能措手者率優為之苟可以利物則死生禍福不復計平居以大事自任而人亦以大任期之評者至今以公用違其長使之卒然就一死為斯世惜也故好問銘其墓

云云

按公所藏及記錄者

有唐武德三年遠祖司空勛國公開山誥有體質平允才器敏洽宣力義旗功叅造昧可吏部尚書宣和內府物也

已下皆晦道堂題詠備在家錄

自餘玉牒授之楚尾毛觀復給事

中知曹州興仁軍府事三衢盧襄贊元濟北李那商老
任庭玉鄧忠臣山東路提刑使濟陰賀公叟楊庭東平
路轉運使鄉先生李上達及子省元防方平濮州軍事
判官林棣姚建榮興祖尚書左丞壽國公金城高汝礪
巖甫同知臨洮府事兼積石州刺史平陽孔天監偉明
尚書右丞汶水賈守謙益之諫議大夫淳南許古道真
戶部尚書權叅知政事臺山楊造叔玉尚書左丞日照
張行忠信甫平章政事蕭國公東阿侯摯萃卿大司農

戶部尚書相人張正倫公理等書札詩篇

在家錄

翰林應

奉東明王鶚百一嘗作誥詞云出知外縣凜乎其德謙
之遺入掾中臺魁然有宰輔之望禮部閑閑趙公許與
公有鵬飛九萬里風斯在下之語其為時賢所推重如
此尚何待僕言正叔以通家之故請為千秋錄作後記
因得件右之或疑商氏名德相望而報施未豐者竊以
水喻之今夫流泉出石罅間從濫觴之微涓涓而不絕
及其合支流會衆川儲蓄淵渟盡洄洑舒徐之態鼓之

以長風驅之以迅雷泄雲雨而涵鬼物雖有千石之舟
十丈之檣遲迴顧盼而不敢發蓋從微至著而有本者
必如是耳今孟卿館嚴侯之門者十餘年侯溫然執擁
篲之敬海內名勝率以清廟之器許之諸郎王立秀發
生長見聞宜有不資於人而自媿者正叔年甫六十安
閑樂易福祿方來他日羔鴈成羣極人門盛事當信僕
言之不妄云癸丑二月吉日河東元好問裕之謹書

故物譜

子家所藏書宋元祐以前物也法書則唐人筆迹及五代寫本為多畫有李范許郭諸人高品就中薛稷六鶴最為超絕先大父銅山府君官汲縣時官賣宣和內府物也銅碌兩小山以酒沃之青翠可摘府君部役時物也風字大硯先東巖君教授鄉里時物也銅雀硯背有大錢一天祿一堅重緻密與石無異先隴城府君官冀州時物也貞祐丙子之兵藏書壁間得存兵退予將奉先夫人南渡河舉而付之太原親舊家自餘雜書及先

人手寫春秋三史莊子文選之等尚千餘冊并畫百軸
載二鹿車自隨三硯則瘞之鄭村別墅是歲寓居三鄉
其十月北兵破潼關避於女几之三潭比下山則焚蕩
之餘蓋無幾矣今此數物多子南州所得或向時之遺
也住在鄉里常侍諸父及兩兄燕談每及家所有書則
必枚舉而問之如曰某書買於某處所傳之何人藏之
者幾何年則欣然志之今雖散亡其綴緝裝幀籤題印
識猶夢寐見之詩有之維桑與梓必恭敬止以予心忖

度之知吾子孫却後當以不知吾今日之為恨也或曰物之閱人多矣世之人玩於物而反為物所玩貪多務取巧偷豪奪遺簪敗履惻然興懷者皆是也李文饒志平泉草木有後世毀一樹一石非吾子孫之語歐陽公至以庸愚處之至於法書名畫若桓玄之愛玩王涯之固護非不為數百年計然不旋踵已為大有力者負之而趨我躬之不可必奚我後之恤哉予以為不然三代鼎鐘其初出於聖人之制今其欵識故在不曰永用享

則曰子子孫孫永寶用豈為聖人者超然遠覽而不能忘情於一物耶抑知其不能必為我有而固欲必之也蓋自莊周列禦寇之說盛世之誕者遂以天地為逆旅形骸為外物雖聖哲之能事有不滿一笑者况外物之外者乎雖然彼固有方內外之辯矣道不同不相為謀使渠果能寒而忘衣飢而忘食以游於方之外雖眇萬物而空之猶有託焉爾如曰不然則備物以致用守器以為智惟得之有道傳之無媿斯可矣亦何必即空以

遣累矯情以趨達以取異於世耶乃作故物譜丙申八月二十有二日洛州元氏太原房某引

遺山集卷三十九

欽定四庫全書

遺山集卷四十

金 元好問 撰

上梁文

南宮廟學大成殿上梁文

兒郎偉竊以窮則變變則通聖人之道所以亘萬世而無敝庶而富富而教司徒之官所以敬五典之克從方屬靈臺偃伯之秋宜有庠序盈門之盛眷紫微之舊治肇清廟之新基繫改作之良難知樂成之有在中國有

詩書之教風以動之癘老思德化之成今其時矣敢竊
闕宮之義以佐武城之歌

兒郎偉拋梁東井邑弓刀變舊風孝悌力田從此始衣
冠禮樂有儒宮

南極目農郊露氣酣五畝樹桑明府教馬鳴無用說宜
蠶

西木鐸新聲換鼓鞀學館大亨知有日富兒未用笑朝
蠶

北草創古來須潤色妙年令佐嚮儒風子弟于今有矜
式

上漢日鄉賢多將相儒林發藻廣川君奎壁光芒三萬
丈

下絃誦洋洋新美化朝家頻賜鶴頭書長吏今年應勸
駕

伏願上梁之後生徒石室常師蜀郡之文翁保障繭絲
不媿晉陽之尹鐸旁沾鄰郡共洽文明

南陽解署上梁文

拙以力巧以勞野人養君子之義政有居訟有所國家
謹官府之常緊改作之果難宜樂成之有在爰從舊邑
改隸新州一朝公解之遞遷三政民居之雜處吏卒靡
瞻依之地簿書失扁鐫之嚴加之餽直稍憊公移即至
度財計役有司誠憚於紛更習陋安卑識者亦為之竊
笑眷惟吾土今號名藩田則九州上腴人則四方和會
山連峴首如瞻大將之鼓旗樹入春陵猶有故鄉之城

郭豈有官為十萬戶之長地方二千里而遙陞級不為之少崇繩墨自拘之如此後逸

外家別業上梁文

窮於途者返於家乃人情之必至勞以生而佚以老亦天道之自然方屬風霜區薄之餘而有里社浮湛之漸茲焉卜築今也落成遺山道人蟬蠹書癡鷄虫祿薄猥以勃窣盤跚之迹仕於危急存亡之秋左曹之斗食未遷東道之戈船已御久矣公私之俱罄困於春夏之長圍窮甚析骸

死惟束手人望荆兄之通好義均紀季之附庸出涕而女
於吳莫追於既往下車而封之杞有覬于方來謀則僉同
議當孰抗爰自上書宰相所謂試微軀於萬仞不側之淵
至於喋血京師亦常保百族於羣盜垂涎之口皇天后土
實聞存趙之謀枯木死灰無復哭秦之淚初一軍構亂羣
小歸功劫太學之名流文鄭人之逆節命由威制佞豈願
為就磨甘露御書之碑細刻錦溪書叟之筆蜀家降款具
存李昊之世修趙王禪文何預陸機之手迹

文選謝平
原內史表伊

誰受賞於我嫁名悼同聲同氣之間有無罪無辜之謗耿
孤懷之自信聽衆口之合攻果吮癰舐痔之自甘雖竄海
投山其何恨惟彼證龜而作鼈始於養虺以成蛇追韓之
騎甫還射羿之弓隨鼓

予北渡之初獻書中令君請以一
寺觀所費養天下名士造謗者二

三亦書中枚
舉之類也

以流言之自止知神理之可憑復齒平民僅

延殘喘澤畔而湘纍已老樓中而楚望奚窮懷先人之敝
廬可憐焦土眷外家之宅相更愧前途豈謂事有幸成計
尤私便東諸侯助竹木之養王錄事寄草堂之貲占松聲

之一丘

東臯子北山賦菊
花兩岸松聲一丘

近桃花之三洞

予此別業與
白子西所居

近相

東牆西壁無補圻之勞上雨旁風有閉藏之固已與

編戶細民而雜處敢用失侯故將而自名因之挫銳以

解紛且以安常而處順老盆濁酒便當接田父之歡春

韭晚菘尚媿奪園夫之利彼扶搖直上擊水三千韋杜

城南去天尺五坐廟堂佐天子蓋有命焉使鄉里稱善

人斯亦足矣輒取合歡之意演為助後之謠

兒郎偉拋梁東人笑家山蕙帳空老大讀書無用處且

將耕獲教兒童

南羊谷山中好石龕杖屨一遊無脚力會稽禹穴更須探

西未要坊名改碧雞種下五株桃樹子本無心學浣花溪

北老怯寒冬思密室嶺頭騎馬是官人萬里風來沙土黑

上何人落日心猶壯雲間道有少微星兩眼眇昏無復

望

下百尺長松遶茅舍他年拈出次山詩七十腰鑣行時

稼

長松萬株遶茅舍又云老公七十自腰鑣將引兒孫行時稼此吾家次山公詩也

伏願上梁之後里仁為美鄰德不孤子期永作知音

曹子

期吾友生

季鷹早思命駕

張緯文留滯燕京

起居飲食身為無事之

之人伏臘歲時家有長生之釀旁沾親舊共樂安閑

青詞

太夫人五七青詞

恩重託身生成之義等禮名猶子嗣續之道存痛卵翼
之未終忽梧捲之永棄敢伸悃悞仰訴昊蒼中謝伏念
臣母張婦德成家母儀範世儉必求於中禮嚴不至於
失慈所以命臣者其道公所以拊臣者其勤盡三釜得
暫榮之祿百身無可贖之年消埃之願莫施風樹之悲
曷已惟幽誠之有假或冥福之可徼敬叩玄科竊依真
蔭土灰有望儻沾再造之仁草木何知永戴曲全之賜

劉宣撫設醮青詞

威然後懲恒情之必至救而不棄大道之曲成惟洪纖
同萬化之歸故幽顯靡一誠之間敢殫悃俯仰叩希夷
中謝 伏念臣某塵劫賦形昏衢失步偶會崩離之遇妄
從角逐之餘出入兩州因循十稔豈微勞之可錄徒多
罪之與俱果令暮景之桑榆尋陷畏塗之荆棘憂虞甫
集喪病踵來暴貴非祥固退藏之已晚孤根易撓在摧
折以何堪悔莫自追孽將安逭眷深衷之有假尚後福
之可徵載舉玄科竊依真廕恭惟至公立德弘濟為仁

閱其翺飛蠕動之愚重以氣化形生之賜土灰有望儻
需善貸之私溝壑未填舉是自新之日

張喜千戶青詞

暴貴無漸一歸自召之菑大德曰生萬有必從之欲敢
殫悃悞仰叩希夷臣某腐朽餘生編齊庶品匪時緣之
幸際撫氣質以奚堪戶封已迫於通侯子婿繼聯於鼎
族滿盈之極負乘是憂果懼瘞天之殃危失保家之長
尚賴至仁之弘濟庶幾大道之曲成恭按玄科竊依真

廕自同草土固所謝之莫知未即仄釘惟改新之永誓

樊守謝土詞

營建非時事闕於倉卒陰陽干禁理藉於祈禳恭扣玄
科切依真廕有相之道何知陰陽之私永建爾家尚覲
曲成之賜

郡守天池祈雨狀

維太歲甲辰四月辛未朔二十四日甲午忻州某官等
惶恐百拜獻狀天池龍君殿下惟神血食一方膏潤千

里靈應之迹著見有年某等資品凡陋德薄任重不能
撫安閭里召迎和氣自開歲以來雖嘗被一溉之賜既
雨而旱今已十旬夏苗欲枯秋稼無望民庶嗷嗷將遂
逋播匪我神明則將疇訴乃消吉旦謹遣管內僧某道
士某躬詣靈湫奉迎甘澤某卑職所限止於道左願俟
雲輿風馬尚辱臨之不勝懇禱之至謹狀

祭文

祭飛蝗文

粵惟此州百道從出調度之急膏血既枯懸望此秋以紓日夕沴氣所召百騰踵來種類之繁蔽映天日如雲之稼一飽莫供道路嗷嗷無望卒歲考之傳記事有前聞魯公中牟今為異政貪墨汝罰詎曰弗靈言念茲時瀕於陸沉吏實不德民則何辜歲或凶荒轉死誰拯敢殫志願神其憫之

為第四女配婿祭家廟文

維太歲辛亥十二月丙辰朔十有四日己巳孝曾孫元

某謹以家奠敢昭告于顯曾祖忠顯府君曾祖妣王氏
顯祖朝列大夫銅山府君顯祖妣河南縣太君趙氏顯
伯考贈中順大夫東巖府君顯伯妣河南郡太君王氏
顯考廣威隴城府君顯妣河南縣太君張氏先以庚戌
八月為第四女擇配得世官張氏之長子興祖作婿家
居龜筮叶吉今正是時廟授有儀式伸虔告尚饗

中令耶律公祭先妣國夫人文

維大朝癸卯歲八月乙巳朔五日己酉哀子某謹以家

莫敢昭告于先妣國夫人蘇氏之靈負釁蒙累貽禍庭
闈龜筮告期迫於襄事尚假殘息勉瀝血誠維先夫人
系繇鼎族天作之配嬪於我家婦德有光母儀克備彤
管所擬於古無慙維我嚴君蚤逢昌運仕非為己義不
及私家政所由倚之中饋悉力一志以濟時康寅亮天
工實資內助謂當陽報俾壽而康如何盛年奄棄榮養
相彼庶品資於坤元得一靡常修焉傾圯藐是煢獨託
體何從創鉅痛深百隕奚贖人皆有母今我獨無哀哀

昊穹忍此荼毒終天一慟五內崩離嗚呼哀哉伏惟尚饗

題跋

跋國朝名公書

任南麓書如老法家斷獄網密文峻不免嚴而少恩使之治京兆亦當不在趙張二王之下黃山書如深山道人草衣木食不可以衣冠禮樂束縛遠而望之知其為風塵表物黃華書如東晉名流往往以風流自命如封

胡羯末猶有蘊藉可觀閑閑公書如本色頭陀學至無
學橫說豎說無非般若百年以來以書名者多不媿古
人宇文大學叔通王禮部無競蔡丞相伯堅父子吳深
州彥高高待制子文耳目所接見行輩相後先為一時
任南麓趙黃山趙禮部龐都運才卿史集賢季宏王都
勾清卿許司諫道真為一時龐許且置若党承旨正書
八分開閑以為百年以來無與比者篆字則李陽冰以
後一人郭忠恕徐常侍不論今卷中諸公書皆備而竹

溪獨見遺正如鄴中賓客應劉徐阮皆天下之選使坐
無陳思王則亦不得不為西園清夜惜也歲甲午三月
二十有三日書

題樗軒九歌遺音大字後

昨國公詩筆圓美字畫清健南渡以後楊趙諸公無不
歎賞有不待言者公家所藏名畫當中秘十分之二客
至相與展玩品第高下至於筆虛筆實前人不言之秘
皆纖悉道之故時人推畫中有鑒裁者唯公與龐都運

才卿李治中平甫三二人而已予意公畫亦必入品而
世未嘗見蓋詩與畫同源豈有工於彼而不工於此者
如前所書九歌遺音謂非李思訓著色趙大年小景可

耳

九歌遺音易西山薊東山蒼檜千章竹萬竿嶺頭雲
自開杏花殘欲春闌立玉峰前水一灣鷗飛落照間

正大三年季春二
十三日為松庵書

跋閑閑自書樂善堂詩

人皆有兩足不踐荊棘地人皆有兩手不劇虎兕齒如
何身與心擇善不如是從善如登天從惡如棄屣而於

趨舍乖知之不審耳盜跖膾人肝顏子一瓢水均為一
窖塵誰光百世祀較其得失閒奚翅千萬里所以賢達
人去彼而取此道腴時雋永世味不染指作詩銘吾堂
兼以勗諸已閑閑公此詩為他人作而皆公日用之實
古人謂有德者必有言又曰立言踐行公無媿焉今日
見公心畫玩其辭旨不覺歛衽生敬公嘗為襄城廟學
作省齋銘云言有非耶行有違耶君子之棄而小人之
歸耶銘不滿二十言而於三省之義委曲備盡可以一

倡而三歎惜今世不傳因附於此癸丑六月吉日門生
河東元某謹書

跋二張相帖

二張皆人豪不應以責文士者責之書粗記姓名已為
過望況工妙如此耶

跋蘇黃帖

蘇黃翰墨片言隻字皆未名之寶百不為多一不為少
尚計少作耶

跋松庵馮丈書

士大夫有天下重名然其詩筆字畫大有不能稱副者
閑閑公有言以人品取字畫其失自歐公始如吾松庵
丈詩筆字畫皆不減古人以人品取之歐公之言亦不
為過必有能辯之者

跋蘇叔黨帖

叔黨文筆雄贍殊有鳳毛坡嘗云海外無以自娛過子
每作文一篇輒喜數日蘇氏父子昆弟文派若不相遠

俗子乃疑黃樓賦坡亦嘗辯之颶風賦亦謂非坡不能作不然亦當增入筆點竄之也風俗薄惡如此文賦且不論至如叔黨此帖其得意處豈亦坡代書耶可以發一笑也閏月十八日書

跋東坡和淵明飲酒詩後

東坡和陶氣象祇是坡詩如云三杯洗戰國一斗消彊秦淵明決不能辦此獨恨空杯亦嘗持之句與論無絃琴者自相矛盾別一詩云二子真我客不醉亦陶然此

為佳丙辰秋八月十二日題

題蘇氏父子墨帖

次公字畫端愿而靖深類其為人小坡筆意稍縱放然終不能改家法杞國節士八大字某不能識其妙處故不敢妄論甲寅閏月十有七日同覺師大中清涼僧舍敬覽

題許汾陽詩後

眼醫許太丞彥清示其從祖汾陽君山水圖詩語意高

妙而其字畫與明昌辭人龍品黃華黃山諸公各自名家世尤寶惜之其子右司諫道真亦以能書稱今以汾陽筆法較之父子如出一手生平亦嘗見蔡大學安世大丞相伯堅維州使君伯正甫三世傳字學雖明眼人亦不能辨前輩守家法蓋如此汾陽守澤州日戒子云婁相任唾面周廟貴緘口寸陰大禹惜三命考父走吾河東人至今傳誦之司諫在貞祐興定間直言極諫與陳公正叔齊名時號陳許父子名流在中朝百餘年少

有似者而彥清承其後何其幸耶彥清隱於技者三十年技既高又所至以善良稱謂之稱其家蓋無媿也此詩渠家青氈其寶祕之當令後人知世德之所自云丙辰夏六月二十一日晚進河東元某謹書

毛氏家訓後跋語

渭南君避地中方正鄉方從事洛陽之西樞君手書戒敕以公清廉正不昧神理為言內翰王君伯翼述之備矣某向在汴梁婦翁提舉以宗盟之故與君通譜牒相

好善已數十年矣兩君資稟高亮略相彷彿言行之間
有不期合而合者提舉馳驛方城御史以私憤橫造飛
語遂陷詔獄一債而不復振無所告語書與渭南敘述
始末終之以許國之誠唯天地神祇可知朝廷雖復知
誣染亦無為昭雪之者此書正卿亦嘗見示因得并渭
南手筆紬繹之私竊慨嘆東坡有言人無所不至唯天
不容偽壬辰之亂侯王家世之舊忠賢名士之裔不顧
仆於草野則流離於道路者多矣大名毛氏特絕而復

續稍微而更熾河潤九里澤及中表孰謂不有以啓之
吾知中方執筆之際渭南之子孫弟姪固已安居於雞
水之上矣已酉冬某自燕還幕府館客勤甚公夫人子
姨也獲觀世德名氏敢以蕪辭繼於王內翰之後十一
月二十六日姪婿河東元某斂衽書

跋張仲可東阿鄉賢記

東阿進士張仲可以鄉先生平章政事壽國張公參知
政事翰林學士承旨高公平章政事蕭國侯公而下由

文階而進者凡二十有三人既列其姓名刻之石又謄
寫別本以示同志僕意以為壽公初諫立元妃李氏再
諫山東軍撥地以為得軍心而失民心其禍有不可勝
言者言既不聽即致相印而歸風節凜凜當代名臣無
出其右者蕭公行臺東平威惠並舉山東父老焚香迎
拜有太平宰相之目承旨公之死節雖古人無以加雖
不見於金石孰不敬而仰之自餘二十人不見行事徒
記爵里僕竊以為未盡何則追述前賢鄉里後生實任

其責柳子厚先友紀近世名臣言行錄有例也至於大
縣萬家歷承平百年之久風化之所涵養名節之所勸
激一介之士時命不偶齎志下泉以與草木同腐者亦
何可勝數誠使見之紀錄如汝南先賢襄陽耆舊以垂示
永久此例獨不可援乎仲可名家子有志於學故敢以
相告見賈丈顯之嘗試問之以為如何歲丁巳夏五月
二十六日河東人元某謹書

跋紫微劉尊師山水

山水家李成范寬之後郭熙為高品熙筆老而不衰山
谷詩有郭熙雖老眼猶明之句記熙年八十餘時畫也
近世太原張公佐山間風雨有入神之妙年八十六乃
終平生遺蹟河東往往有之公佐之後得紫微劉尊師
尊師愛畫山水晚得郭熙平遠四幅愛而學之自是畫
筆大進今年九十有七為門弟子邵抱質作春雲出谷
湖天清畫千崖秋氣雪滿羣山殊有典刑抱質請予題
記因為書之此翁定襄人童外入道道行高潔而邃於

玄學吾夫子謂人之生也直者於茲見之予恐後人閱
翁此筆但與郭熙公佐論優劣而不知其道行如此玄
學如此故表出之歲癸丑冬十月旦郡人元某記

題學易先生劉斯立詩帖後

學易先生詩絕似東坡和陶不應入江西派閑閑之論
定矣此詩余初到崧山時曾見之能得其意而不能記
其辭搜訪一十年北渡後將還太原過東郡乃復見之
鄉人王清卿家愛之深而不見之久煥若神明頻還舊

觀故喜為之書余家唐劉長卿詩學易堂舊物是先生
手所校本題云壬午六月就夏英公孫儀公家本校之
字畫楚楚如唐人書盤谷序又儀真令諱蹟者皇統宰
相宣叔之父是先生弟昆行有詩文二冊號南榮集宣
叔錄之以備遺忘亂後唯余家有之然則余於學易劉
氏豈世之所謂緣熟者耶戊戌八月六日謹書

跋龍品書柳子厚獨覺一詩

龍品此卷大字學東坡而稍有欽東故步仍在末後四

行二十二字如行雲流水自有奇趣唯其在有意無意之間故如出兩手耳

題閑閑書赤壁賦後

夏口之戰古今喜稱道之東坡赤壁詞殆戲以周郎自況也詞纔百許字而江山人物無復餘蘊宜其為樂府絕唱閑閑公乃以仙語追和之非特詞氣放逸絕去翰墨畦逕其字畫亦無媿也辛亥夏五月以事來太原借宿大悲僧舍田侯秀實出此軸見示閑閑七十有四以


壬辰歲下世今此十二日其諱日也感念疇昔悵然久之因題其後赤壁武元真所畫門生元某謹書

遺山集後引

正大中詔翰林院官各舉所知時閑閑先生方握文柄於人材慎許可首以元子裕之應詔朝議是之而天下無異辭蓋子之幼也已得其先大夫東巖君之指授稍長博極羣書且多與名士游故於冠歲蘄然見頭角肆筆成章往往膾炙人口貞祐

南遷文譽日崇作詩自名一家其於古調樂府為
尤長不惟可以追配古人而一時學罕見其匹士
林英彥不謀而同目之曰元子尊之也後雖出知
劇縣入主都司簿書倥偬之際不廢吟詠北渡以
來放懷詩酒遊戲翰墨片言隻字得者猶以為榮
閒作中州一集旁搜遠引發揚前輩遺美其敘事
之工槩可見矣國朝將新一代實錄附修遼金二
史而吾子榮膺是選無何恩命未下哀訃遽聞使

雄文鉅筆不得馳騁於數十百年之間吁可悲夫
東平嚴侯弟忠傑富貴而好禮者也即其家購求
遺藁捐金鳩匠刻梓以壽其傳屬余為引余與子
同庶甲又同在史館者三歷春秋義深契厚固不
當辭然仁卿大手已序於前顧余荒謬安敢贅長
語於其旁感念疇昔姑以平日親所聞見與夫同
志之所常談者書諸卷末云歲昭陽大淵獻秋七
月己丑慎獨老人曹南王鶚識



遺山集卷四十

欽定四庫全書

集部
遺山集附錄

詳校官中書臣沈 颺

主事臣呂雲棟覆勘

總校官編修臣倉聖脉

校對官編修臣沈清藻

謄錄監生臣李世麟

欽定四庫全書

遺山集附錄

金史文藝傳

遺山先生墓銘

祭遺山先生文

元遺山真贊

原古上元學士

壽元內翰

辨磨甘露碑

游華山寄元裕之

寄裕之

繫舟山圖裕之先大夫嘗居此山之東岩

李平甫為裕之畫繫舟山圖閑閑公有詩繼作

子端山水同裕之賦

馬圖同裕之賦

韓筆定棄霍
益之家物

書懷繼元弟裕之韻

次韻荅裕之

寄裕之 二首

次韻裕之見寄 二首

題裕之家山圖

同裕之再過會善有懷希顏

贈裕之

元裕之以山遊見招兼以詩四首為寄因以山中
之意仍其韻

同裕之欽叔分韻得莫論二字

玉華山中同裕之分韻送欽叔得歸字

九日登少室絕頂同裕之分韻得蘿字

次裕之韻兼及景玄弟

玉華谷同希顏裕之分韻得秋字

滎陽古城登覽寄裕之

送裕之還嵩山

遊丹霞下院同裕之鼎玉分得留字

送裕之官鄧下兼簡仲澤

和裕之二首

題裕之家山圖

贈荅史院從事

送裕之往許州酒間有請予歌渭城煙雨者因及之

寄裕之

古月一篇為裕之賦

讀裕之弟詩藁有鶯聲柳巷深之句漫題三詩其
後

跋遺山墨跡

遺山先生挽詩

題中州詩集後

金史文藝傳

元德明系出拓拔魏太原秀容人自幼嗜讀書口不言
世俗鄙事樂易無畦畛布衣蔬食處之自若家人不敢

以生理累之累舉不第放浪山水間飲酒賦詩以自適
年四十八卒有東齋集三卷子好問最知名好問字裕
之七歲能詩年十有四從陵川郝晉卿學不事舉業淹
貫經傳百家六年而業成下太行渡太河為箕山琴臺
等詩禮部趙秉文見之以為近代無此作也於是名震
京師中興定五年第歷內鄉令正大中為南陽令天興
初擢尚書省掾頃之除左司都事轉行尚書省左司員
外郎金亡不仕為文有繩尺脩衆體其詩奇崛而絕雕

劇巧縟而謝綺麗五言高古沈鬱七言樂府不用古題
特出新意歌謠慷慨挾幽并之氣其長短句揄揚新聲
以寓恩怨者又數百篇兵後故老皆盡好問蔚為一代
宗工四方碑板銘志盡趣其門其所著文章詩若干卷
杜詩學一卷東坡詩雅三卷錦機一卷詩文自警十卷
晚年尤以著作自任以金源氏有天下典章法度幾及
漢唐國亡史作已所當任時金國實錄在順天張萬戶
家乃言於張願為撰述既而為樂夔所沮而止好問曰

不可令一代之迹泯而不傳乃構亭於家著述其上因名曰野史凡金源君臣遺言往行采摭所聞有所得輒以寸紙細字為記錄至百餘萬言今所傳者有中州集及壬辰雜編若干卷年六十八卒纂脩金史多本其所著云

遺山先生墓銘

郝

經

見陵川集

歲丁巳秋九月四日遺山先生卒於獲鹿寓舍十日訃至經走常山三百里已馬舁歸葬藝文酌酒哭于畫像

之前而已先生與家君同受業于先大父經復逮事先
生者有年義當叙而銘之詩自三百篇以來極于李杜
其後纖靡淫艷怪誕癖澁寔以弛弱遂失其正二百餘
年而至蘇黃振起衰路益為瑰奇復于李杜氏金源有
國士務決科干祿置詩文不為其或為之則羣聚訕笑
大以為異委墜廢絕百有餘年而先生出焉當德陵之
末獨以詩鳴上薄風雅中規李杜粹然一出于正直配
蘇黃氏天才清瞻邃婉高古沉鬱大和力出意外巧縟

而不見斧鑿新麗而絕去浮靡造微而神采粲發雜弄
金壁糝飾丹素奇芬異秀洞蕩心魄看花把酒歌謠跌宕
挾幽并之氣高視一世以五言雅為主出奇于長句
雜言至五千五百餘篇為古樂府不用古題特出新意
以寫怨思者又百餘篇用今題為樂府揄揚新聲者又
數十百篇皆近古所未有也汴梁亡故老皆盡先生遂
為一代宗匠以文章伯獨步幾三十年銘天下功德者
盡趣其門有例有法有宗有趣又至百餘首為杜詩學

東坡詩雅錦機詩文自警等集指授學者方吾道壞爛
文曜噓昧先生獨能振而鼓之揭光于天俾學者歸仰
識詩文之正而傳其命脉繫而不絕其有功于世又大
也每以著作自任以金源氏有天下典章法度幾及漢
唐國亡史興已所當為而國史實錄在順天道萬戶張
公府乃言于張公使之聞奏願為撰述奏可方闢館為
人所沮而止先生曰不可遂令一代之美泯而不聞乃
為中州集百餘卷又為金源君臣言行錄往來四方采

撫遺逸有所得輒以寸紙細字親為記錄雖甚醉不忘
於是雜錄近世事至百餘萬言捆束委積塞屋數楹名
之曰野史亭書未就而卒嗚呼先生可謂忠矣先生諱
好問字裕之太原定襄人係出拓拔故魏姓元氏曾大
父某大父某父某妣某氏先生七歲能詩太原王湯臣
稱為神童年十一從其叔父官于冀州學士路宣叔賞
其俊與教之為文年十有四其叔父為陵川令遂從先
大父學先大父即與屬和或者譏其不事舉業先大父

言吾正不欲渠為舉子爾區區一第不足道也遂肆意
經傳貫穿百家六年而業成下太行渡大河為箕山琴
臺等詩趙禮部見之以為少陵以來無此作也以書招
之於是名震京師目為元才子登興定三年進士第不
就選往來箕潁者數年而大放厥辭於是家累其什人
嚼其句洋溢于里巷吟諷于道塗巍然坡谷復出也正
大中辟鄧州南陽令南陽大縣兵民十餘萬帥府令兼
鎮府甚有威惠以大夫人哀疾辭劇致養轉內鄉令丁

艱憂終喪詔為尚書都省掾天興初入翰林知制誥金
亡不仕而卒春秋六十有八卒之某月日葬于定襄之
先塋前配太原張氏再配臨清毛氏子男三人曰某某
女三人長適進士程端甫次為女冠次適張某銘曰

士子賈技爭綴緝僥倖寸祿奔走急以為詩文作無益糞
壤擲棄明月璧先生卓犖有異識振筆便入蘇黃室開
闢文源翦荆棘大聲復完金玉擊爛熳長醉思盈溢瑞
錦秋花亂堆積險妬護前喘肝臆羣犬狺狺共讒嫉塵

埃野馬為鬼蜮遺山岩岩倚天壁國史興喪是吾職義烈不負董狐筆定襄高寒拓拔國馬舁歸來反玄宅有書有傳俱未卒嗚呼先生端可惜嗚呼先生不可得

祭遺山先生文

維年月日陵川郝經謹以清酌之奠致祭于遺山先生之靈嗚呼氣數之窮靡物不壞或者不淪胥乃造物者之所在造物之所在宜莫不生而奪于成是理其可明邪嗚呼先生萃靈蜚英羈州官學嶽嶽稜稜碩士鴻儒

莫不震驚以為間世生

開闢初見公文曰是間世生者

渡南河而為名

公入京師而為名卿張洞庭之天音引岐山之鳳鳴方雷厲以風飛挾鴻章而振纓挫萬象於筆端倒河漢而一傾攄塵言與滯思淪錮濁以為清闕斯文之洪源俾灝汗而淵澄而乃汴蔡淪亡蜚血凌城氣數俱盡萬化崩騰時惟先生獨矯首而行挽崦嵫之日嚙欲曙之星收有金百年之元氣著衣冠一代之典刑辭林義數文模道程獨步于河朔者幾三十年豈非造物者之所在

而斯文殆將興邪去魯西來適駿有聲天奎不芒遂入
杳冥筆未獲麟年未中壽而奪去之遽彼造物者果可
明耶嗚呼先生雅言之高古雜言之豪宕足以繼坡谷
古文之有體金石之有例足以肩蔡党樂章之雄麗情
致之幽婉足以追稼軒其籠罩宇宙之氣撼揺天地之
筆囚鎖造化之才穴洞古今之學則又不可勝言人得
其偏先生得其全天不假之年嗚呼哀哉先生雖死文
或不死是謂亡而不死先生雖可哀吾徒無所仰尤為

可哀也嗚呼哀哉尚饗

元遺山真贊

其才清以新其氣夷以春其中和以仁其志忠以勤不
啻蔡辛與坡谷為鄰歌謠慷慨喜氣津津唾玉噴珠看
花飲醇而乃藝香讀易坐席凝塵假邪真邪嗚呼復幾
千年更有茲人也邪

原古上元學士

麟死九鼎淪萬世無孔孟文字糠粃餘扶藉不絕聖伊

昔大觀季天王始失政中聲入哇淫吾道孰不競金源
東北來一洗河海淨斯文甚濫觴幾墜土梗橫吳楚割
半天瘡痍僅續命伊洛遽騫騰朱張立朝廷弘肆六藝
學俾與日月並中原有奇才詞賦方餽飭天門黃金榜
赫耀動萬姓君臣此為得父師此為令或者語詩文環
視驚盼矚孰意元化精不遂入昏瞋浚發自蔡党高步
出遼曼墨浸天壤深筆掃風雷勁絲綸帝載熙訓誥王
言瑩諸公繼踵作互執造化柄黃山與黃華雙鳳高蹭

登清風玉樹鳴千古一輝映有若閑閑公光彩壁月恒
雲烟恣揮灑乾坤快歌詠疊疊金聲鏗矯矯銀鈎硬楊
馮李雷麻疑夢胥倡應五行連麗天四海望而敬偉哉
遺山老青雲動高興文林剗荆棘翰府開蹊徑秋空玉
琴張搏拊分雅鄭三問一曲歌忽喚劉伶醒哀哀汴蔡
亡六合為懸磬此老獨巍然聲價駭羣聽振袂凌孤霞
珠壁飛欬謦人宗一代文天賦百年盛紛紛夸毗子
擗撫為訾評自謂人勝天詎知天已定行行野史成共

為天下慶作噩建子月授我以照乘節屋散馬見斗寒焰
忽蟠亘經也生已晚弗及拜先正窮閭一束書十載成
墮甌學問苟有歸貧窶安足病今乃得溟渤問津有龜
鏡挈我登龍門綆我出虎甯搖搖風中旌茲始見依凭
緬思先世澤于今果無竟嗚呼世道喪欲語寒淚迸何
時倒銀漢與世開艷艷昂頭冠三山俯瞰旭日晟陸海
闢文源生民共涵泳

壽元內翰

秋風颯颯吹庭梧長庚吐焰橫太虛遺山先生曳長裾
醉鞭黃鵠來天隅蹴開化窟肆搜取玉斗倒瀉明月珠
九原呼屈原底事為焦枯青雲問李白佳句今何如百
年元氣一盃酒千丈光輝萬卷書高卧一曲歌聲價百
碑礫雲璈宮徵奏玉宇春鶯花柳鳴天衢惜哉時不與
命偶西周削弱為東都明堂一柱入樵採安得致主為
唐虞遺山山頭有舊廬歸來亦足為歡娛既有墮地風
雲之驪駒又有竹花弄語之鷓鴣仰天一笑萬事足倒

騎箕尾遊蓬壺

辨磨甘露碑

國賊反城自為功萬段不足仍推崇勒文訟德召學士
淳南先生付一死林希更不顧名節兄為起艸弟親刻
省前便磨甘露碑書丹即用宰相血百年涵養一塗地
父老來看閭流涕數樽黃封幾斛米賣却家聲都不計
盜據中國責金源吠堯極口無覲顏作詩為告曹廳翁
且莫獨罪元遺山

游華山寄元裕之

趙秉文

見滄水集

我從秦川來，遍歷終南游。暮行華陰道，清明快雙眸。
東風一夜橫，作惡塵埃咫尺迷。崑崙山神戲人亦薄相，
一盃未盡陰霾收。但見兩崖巨壁，插劍戟，流泉夾道鳴。
琳瑯希夷石室，綠蘿合金仙鶴駕，空悠悠。石門劃斷一
峰出，婆娑石上為遲留。上方可望不可到，崖傾路絕令人愁。
十盤九折羊角上，青柯平土得少休。三峰壁立五千仞，
其下無址傍無儔。巨靈仙掌在霄漢，銀河飛下青

雲頭或云竒勝在高頂脚力未易供冥搜蒼龍嶺瘦苔
蘚滑嵌空石磴誰雕鏤每怜風自四山而下不見底惟
聞松聲萬壑寒颼颼捫參歷井到絕頂下視塵世區中
囚酒酣蒼茫瞰無際塊視五岳芥九州南望漢中山碧
玉簪亂抽况復秦宮與漢闕飄然聚散風中漚上有明
星玉女之洞天二十八宿環且周又有千歲之玉蓮花
開十丈藕如舟五鬣不朽之長松流膏入地盤蛟虬采
根食實可羽化方瞳綠髮三千秋時聞笙簫明月夜芝

翦羽蓋來瀛洲乾坤不老青山色日月萬古無停輶君
且為我挽回六龍轡我亦為君倒却黃河流終期汗漫
遊八極乘風更覓元丹丘

寄裕之

久雨新晴散痺頑一軒涼思坐中間樹頭風寫無窮水
天末雲移不定山宦味漸思生處樂人生難得老來閑
紫芝眉宇何時見誰與嵩山共往還

繫舟山圖裕之先大夫嘗居此山之東岩

山頭佛屋五三間山勢相連石嶺闢名字不經從我改
便稱元子讀書山

李平甫為裕之畫繫舟山圖閑閑公有詩某亦

繼作

楊雲翼

俱見中州集

名利走朝市山居良獨難況復山中人讀書不求官東
崑有佳致書室方丈寬彼美元夫子學道如觀濶孔孟
澤有餘曾顏膏未殘向來種德深直與山根蟠之子起
其門孤鳳騫羽翰計偕聊爾耳平步青雲端謁來遊京

師士子拭目觀禮部天下士文盟今歐韓一見折行輩
殆如平生歡舞雩詠春風期著曾黜冠五言造平淡許
上蘇州壇我嘗讀子詩一唱而三歎世人非無才多為
才所謾高者足詆訶下者或辛酸吾子忠厚姿不受薄
俗漫晴雲意自高淵水聲無湍他日傳吾道政要才行
完會使茲山名與子俱不刊

子端山水同裕之賦

李純甫

遼鶴歸來萬事空人間無地著詩翁只留海岳樓中景

長在經營慘淡中

馬圖同裕之賦

韓筆定襄霍
益之家物

天馬飛來不苦難
雲屯萬騎開元間
太平有象韓生筆
曾見貞龍如此閑

書懷繼元弟裕之韻

趙元

著龜不須問我命
只自知多生墮宿業
世網纏綿之驂
騑受羈銜大笑跛
鼈遲跛鼈亦復笑
縮首甘自卑何必
參漆園物理本自
齊檳榔可消穀志
士常苦飢穆之萬
人

雄猶不免此譏我懦更多病區區欲何為鐘鼎不可倖
藜藿分所宜安能如黃蜂為人填蜜脾清白儻少污平聲
後人何所貽初學悔大謬篆刻工文辭年來厭酸鹹淡
愛陶潛詩愛詩固自佳其如未忘機回頭四十年言動
俱成非誰能逐世利日久常規規惟當種溪田與子常
相期

憲廡有生意山間春到時長安冠蓋塵游哉不如茲西
疇將有事老農真吾師不見元魯山夢寐役所思遺山

乃其後僻處政坐詩時復一相過照眼珊瑚枝寄書多
攜來為子卧聽之

少從白衫游氣與山崢嶸一念墮文字腸腹期拄撐多
機天所災室暗燈不熒拈書枕頭睡鼻息春雷鳴泰山
與鴻毛何者為重輕蹄涔與渤澥誰能較虧盈如能平
其心一切當自平

嵩箕有奇姿出雲何悠然雲山足佳處留客今幾年有
子罷讀書求種山間田栗里愧淵明香山慚樂天二老

已古人相望雲泥懸得酒邀月來對影空自憐攝衣欲
起舞稚子不須牽

次韻荅裕之

薄暮敲門喜客佳水萍風絮共天涯行藏一話傾心肺
古律三詩淬齒牙朱研不妨閒度日青山終得共餐霞
扶持老病須君輩滿地豺狼萬里家

寄裕之二首

汨沒兵塵滿鬢霜買鄰心樂古清涼閑陪老秀春行脚

悶欠矐元夜對床正欲脫身求兔窟誰能隨世轉羊腸
南陽未比嵩陽好滿眼交游即故鄉

老懶愚軒百不能飽諳人意冷於冰清狂舊日耽詩客
灰朽而今有髮僧眠裏衾三丈日話延雪屋一龕燈
新開一逕通蘭若斬盡清涼舊葛藤

次韻裕之見寄二首

魚入深淵鶴在陰飛潛何幸遠庖砧乾坤萬里雲無迹
冰雪三冬栢有心故國勾留清夜夢歲華分付白頭吟

華川擬作桃源隱共與青山閱古今

古屋颼颼四壁塵不堪憂獨足吟呻
執儲看客常年慣
家具為農近日新
世味飽嘗唯可睡
詩情漫苦不醫貧
相從分我西山半
欲乞臞元伴老身

題裕之家山圖

繫舟盤盤連石嶺
牧馬澄澄倒山影
山光水氣相混涵
中有元家舊廬井
鴈門一開豺虎場
駕言投迹嵩之陽
青山偃蹇不可將
十年竟墮兵塵黃
東巖風物知猶在

說與寄庵神已會一揮淡墨能似之清輝遠寄形骸外
元家故山吾與鄰夢見不如畫圖真舊曾行處聊經眼
未得歸時亦可人

同裕之再過會善有懷希顏 馮壁

寺元魏離宮十日來凡兩前與髯卿偕齋奠少林往其
時已薄暮諸勝不暇訪今同魏諸孫再到風煙上寺僧
導升殿雄深肅瞻仰柱礎門限砧追琢成大壯不見磨
琢痕瑩滑明澗朗摩挲三嘆息後世無此匠晚登西南

亭碧玉對千丈如王官天柱如太華仙掌留宿贊公房
秀色夢餘想夜靜耿不眠泉溜琴筑響悟鬢今不來聯
詩共清賞

贈裕之

麻九疇

向來三度見君詩常望西山有所思誰料并州天絕處
相逢梁苑雪消時賢人樂古聲猶在聲史文高世豈知
只恐神高不留客秦川如畫渭如絲

元裕之以山遊見招兼以詩四首為寄因以山

中之意仍其韻

石華政可採負我孤舟蓬胡為紅塵裏擾擾槐安宮山
間綠蘿月一照千巖空洪崖去不返清游誰與同空餘
松根泉雜佩流無窮人心墮泥滓不如與天通舉頭視
霄漢浩露洗心骨

日月兩角蝸天地一粒粟老盆可徑醉豈擇瓦與玉大
笑區中人朱門丐梁肉清曉登少室日夕眺王屋紫煙
晞我髮碧霞貯我腹溪中有白雲萬事付濯足物物愜

幽情不獨蘭與菊

南風八桂樹高葉碧崢嶸舉手戲攀折上與雲煙撐黃
金間白玉遍地光晶瑩笙簫坐間發鸞鶴空中鳴浩歌
山谷應起舞衣裳輕一尊石上酒如我浩氣盈目送飛
鴻盡青雲萬里平

國風久已熄如火不再然流為玉臺詠鉛粉嬌華年政
須洗妖冶八駿踏芝田青苔明月露碧樹涼風天塵土
一一畫象緯昭昭懸寂寥抱玉辨爭竟搖尾憐幸有元

公子不為常語牽

同裕之欽叔分韻得莫論二字

雷淵

幼安謝辟命子雲老寂寞趨嚮豈獨異時命非所度我
久困流離一廛永負郭雖無斬敵功尚舉力田爵崧少
啓吾封四履盡伊洛有客來問津醉眼入寥廓世事久
閉眼終日只睡昏清風何處來佳客已在門倒屣往從
之玉色向我溫妻孥趣作具歡喜傾瓶盆清夜襍被往

共就遺山元嘲謔及俳語發揮間微言懸斷漏天樞高
嘯驚鄰垣脰合政相和意到俄孤騫恨不倒困廩矧肯
留籬樊弃屨獲珠玉披榛見蘭蓀我肱已三折醉墮偶
全渾知無適俗韻量力任灌園二君清廟器巾綈華壘
尊蒼生望休息朝廷待崇尊出處既異途會合難預論
此樂未易得此夕勿憚煩白酒舉初子黃鷄溷諸孫水
樂喧後部山鬟秀前軒一醉萬事休商聲滿乾坤

玉華山中同裕之分韻送欽叔得歸字

洗耳潁川水療飢西山薇山川得佳客草木生光輝末
路風教薄此道日已微相期千載事非君誰與歸

九日登少室絕頂同裕之分韻得蘿字

閑居受重九佳人重相過登高酬節物少室鬱嵒峩迤
邐謝塵土夷猶出煙蘿歛如據黿頭萬壑俯蜂窩浩浩
跨積風瀾瀾渺長河日車昇紅輪天宇凝蒼波指點數
齊州始覺氛埃多我無倚天劍有淚空滂沱驚鱗盼與
渚倦翼占危柯悔不與家來結茅老巖阿歸途睠老阮

廣武意如何

次裕之韻兼及景玄弟

名腸相歎半成灰戰退紛華旆始迴
文字喜逢脩月手
津梁愧乏濟川材等閑有酒輒共醉
信口哦詩不置才
最憶平生劉子駿紫芝可惜不偕來

玉華谷同希顏裕之分韻得秋字

李獻能

玉龍落峽噴飛流空翠霏霏晚不收
軟脚山堂一壺酒

暮涼閑對兩峯秋

滎陽古城登覽寄裕之

突兀高臺上古城，登臨人境兩崢嶸。
關河落日歲云暮，草木臨風氣未平。
虎擲龍拏王伯事，天荒地老古今情。
一盃欲洗興亡恨，為喚窮途阮步兵。

送裕之還嵩山

王渥

高懷不受簿書侵，清潁鷗盟欲重尋。
老去官情知我薄，閑來道念見君深。
對床夜雨他年夢，滿馬西風此日心。

嵩頂勝游誰得共仙聞仙馭待知音

末句用古仙人詩語

游丹霞下院同裕之昂玉分得留字

霜落豐山白水收歲華全在竹園頭賦詩鞍馬慚真賞

載酒林泉阻勝游野色自隨人意遠夕陽應為鳥聲留

仙源回首旌旗隔一笛西風喚客愁

丹霞下寺士人以竹園頭名之

送裕之官鄧下兼簡仲澤 崔遵

青燈別酒夜沉沉力負相思自不任閑裏更誰留我醉
興來無復伴君吟一枝仙桂知難擬千頃黃陂未厭深

為向荊州王粲道安排佳境約相尋

和裕之 二首

行李西來便得君相從回首七經春
君方脩悉原思病我亦私憐仲父貧
底事却成今日別枯腸難著此愁新
鵝肩火色真將驗馬虎何勞更問辛

不幸還能作幸民十年同醉潁川春
酒船載我雖堪老仕路有時或為貧
少室山人三日惡夷門紙價一番新
益知哀樂終年事未唱驪駒鼻已辛

題裕之家山圖

劉昂霄

萬里神州劫火餘
九原夷甫有餘辜
作詩為報元夫子
莫倚家山作畫圖

贈荅史院從事

賈益謙

見說才名自妙年
多慙政府舊妨賢
物華天寶無今古
鳳閣鸞臺孰後先
鄭圃道尊何敢望
濟南書在子當傳
莫言老眼昏花滿
及見風鵬上九天

送裕之往許州酒間有請子歌渭城煙雨者因

及之

辛愿

白酒留分袂青燈約對床
言詩真漫許知己重難忘
爽氣虛韓岳文星照許昌
休歌渭城柳衰老易悲傷

寄裕之

青雲一別阮家郎甚欲題詩遠寄將
好句眼前常蹉過佳人心上不曾忘
誰家秋月茅亭底何處春風錦瑟旁
昌谷煙霞久寂寞歡遊還肯到三鄉

古月一篇為裕之賦

李汾

古月天不收敵君三萬秋天孫弄明鏡光湧雲間流憶
昔放逐江南州金陵女兒歌擢謳草裏烏紗巾散著紫
綺裘酒酣把玉笛直欲捫參歷井騎汗牛醉中呼兒搖
雙舟吾欲乘流下石頭起來茫茫視八極萬里只有元
丹丘丹丘子游人間風塵何為往復還玉華山人近招
我九日朝帝蒼梧山

讀裕之弟詩藁有鶯聲柳巷深之句漫題三詩

其後

兄敏之

阿翁醉語戲兒癡說著蟬詩也道奇吳下阿蒙非向日
新篇爭遣九泉知

鶯藏深樹只聞聲不著詩家畫不成慚愧阿兄無好語
五言城下把降旌

傳家詩學在諸郎剖腹留書死敢忘

先人臨終有剖
腹留書之語背

上錦囊三箭在直須千古說穿楊

跋遺山墨跡

劉因

見容
城集

晚生恨不識遺山每誦歌詩必慨然遺墨數篇君惜取

注家叅校有他年

遺山先生挽詩

閻

復

見元詩

蕭寺秋風捲玉荷
月明人影共婆娑
誰知別後驪駒曲
便是先生薤露歌
野史夜寒虫蠹簡
錦機春暖鳳停梭
祇應前日西川路
常使羊曇忍淚過

題中州詩集後

家鉉翁

見文類

世之治也三光五嶽之氣鍾而為一代人物其生乎中原奮乎齊魯汴洛之間者固中州人物也亦有生於四

方奮於遐外而道學文章為世所宗功化德業被於海
內雖謂之中州人物可也蓋天為斯世而生斯人氣化
之全光岳之英實萃於是一方豈得而私其有哉迨夫
宇縣中分南北異壤而論道統之所自來必曰宗於某
言文脉之所從出必曰派於某又莫非盛時人物範模
憲度之所流衍故壤地有南北而人物無南北道統文
脉無南北雖在萬里外皆中州也況於在中州者乎余
嘗有見於此自燕徙而河間稍得與儒冠縉紳遊暇日

獲觀遺山元子所裒中州集者百年而上南北名人節士鉅儒達官所為詩與其平生出處大致皆采錄不遺而宋建炎以後御命見留與留而得歸者其所為詩與其人節始終亦復見紀凡十卷總而名之曰中州集盛矣哉元子之為此名也廣矣哉元子之用心也夫生於中原而視九州四海之人物猶吾同國之人生於數百年後而視數十百年前人物猶吾生並世之人片言一善殘編佚詩搜訪惟恐其不能盡余於是知元子胷


懷卓犖過人遠甚彼小智自私者同室籬籬一家爾汝
視元子之宏度偉識溟滓下風矣嗚呼若元子者可謂
天下士矣數百載之下必有謂予言為然者

遺山集後序

自有書契以來以文字名世得其全者幾人耳六
經諸子在所勿論姑以兩漢而下至六朝及隋唐
前宋諸人論之上下數千載間何物不品題過何
事不論量了大都幾許不重複字凡經幾手左揭

右扯橫安豎置搓捺亦熟爛盡矣惟其不相蹈襲
自成一家者為得耳噫後之秉筆者亦詎乎其為
言哉今觀遺山文集又別是一副天生爐鞴比古
人轉身處更覺省力不使奇字新之又新不用晦
事深之又深但見其巧不見其拙但見其易不見
其難如梓匠輪輿各輸技能可謂極天下之工如
肥濃甘脆疊為餠飣可謂併天下之味從此家跳
出便知籍湜之汗流者多矣必欲努力追配當復

積學數世然後再議曩在河南時辛敬之先生嘗
為予言吾讀元子詩正如佛說法云吾言如蜜中
邊皆甜此論頗近之矣雖倡優駟僮牛童馬走聞
之莫不以為此皆吾心上言也若夫文之所以為
文亦安用艱辛奇澁為哉敢以東坡之後請元子
繼其可乎不識今之作者以為如何或者曰五百
年後當有揚子雲復出子何必喋喋乃爾濟南杜
仁傑直序



遺山集附錄